

9 JAN 1996

Mahathir-Pekerja

SELESAI PERTIKAIAN MAJIKAN-PEKERJA SECARA LEBIH BERTAMADUN, KATA PM

KUALA LUMPUR, 9 Jan (Bernama) -- Datuk Seri Dr Mahathir Mohamad hari ini berkata masanya sudah tiba untuk difikirkan cara yang lebih bertamadun bagi menyelesaikan sebarang pertikaian antara majikan dan pekerja.

Ketika berucap merasmikan Konvensyen Cuepacs yang ke-20 di Wisma MCA di sini, Perdana Menteri berkata cara yang dimaksudkan ialah penghakiman oleh pihak ketiga atau "arbitration" (timbangtara).

Jika rundingan tidak dapat diselesaikan, maka masalah hendaklah dirujuk kepada pihak ketiga, dengan diadakan peruntukan bagi rayuan kepada badan yang lebih tinggi jika mana-mana pihak tidak berpuas hati dengan pengadilan yang dibuat di peringkat pertama, kata beliau.

"Inilah sepatutnya cara kita menyelesaikan pertikaian antara mana-mana pihak atau pencabulan undang-undang oleh mana-mana pihak," katanya.

Perdana Menteri berkata tanpa sistem kehakiman yang terdapat di negara ini tentulah negara akan mengalami huru-hara.

Sebanyak 800 anggota perwakilan mewakili 180,000 anggota Cuepacs daripada 95 persatuan gabungan menghadiri persidangan tiga tahun sekali selama tiga hari itu. Persidangan kali ini menyaksikan pertandingan jawatan dalam Cuepacs termasuk jawatan Presiden.

Dr Mahathir berkata jika masalah perhubungan atau tuntutan oleh pekerja dapat diselesaikan melalui penghakiman, maka kerugian daripada tindakan mogok atau ugutan untuk mogok tidak akan berlaku.

"Dengan itu, walaupun hakim memutuskan untuk merestui kenaikan upah yang dituntut, kos mogok tidaklah akan ditambah kepada kos pengeluaran perkhidmatan atau barangan," kata beliau.

Malaysia juga, katanya, akan terus dapat bersaing dengan negara-negara lain dalam pemasaran apa juga barangan dan ini akan terus memajukan negara serta membawa banyak nikmat kepada semua orang.

Dr Mahathir menyeru anggota kesatuan sekerja supaya memberi pertimbangan kepada idea itu walaupun ia memang radikal dan sukar diterima.

"Mungkin ada pihak yang menganggap ada udang di sebalik batu. Tetapi janganlah kita tutup hati kita sama sekali. Timbangkanlah juga," katanya.

Perdana Menteri berkata kerajaan tidak mempunyai niat buruk terhadap pekerja kerana "apa yang telah kita lakukan semuanya menguntungkan pekerja."

Beliau berkata Malaysia bernasib baik kerana cara primitif seperti mogok tidak kerap digunakan untuk menyelesaikan masalah antara majikan dan pekerja.

Sebaliknya, kata beliau, kebanyakan daripada masalah itu diselesaikan secara rundingan atau rundingtara tanpa mogok.

Dengan cara itu, keamanan industri dapat dipelihara untuk menarik pelabur asing serta menambah peluang pekerjaan.

Dr Mahathir berkata mungkin pada suatu masa dahulu tidak ada jalan lain untuk menyelesaikan tuntutan pekerja melainkan dengan cara ugutan atau tindakan merosakkan perniagaan dan harta majikan melalui mogok atau merosakkan punca pendapatan pekerja melalui "lock-out" (sekat daripada masuk bekerja).

"Tetapi hari ini tamadun kita mengiktiraf dan menerima hak pekerja dan pentingnya mereka dilayan dengan adil.

"Apakah kita masih memerlukan ujian kekuatan atau ketahanan untuk menyelesaikan masalah antara majikan dan pekerja?... Tidakkah cara ini agak primitif?" tanya beliau.

Beliau berkata pencapaian negara-negara Barat yang percaya pada ujian kekuatan dan kesanggupan menerima kebinasaan kepada diri sendiri sebagai cara penyelesaian masalah hanya merugikan semua pihak termasuk pekerja dan majikan.

"Oleh kerana negara Barat mempunyai sistem saraan bagi penganggur, pekerja tidak begitu takut kehilangan kerja," kata beliau.

Tetapi yang anehnya, kata Perdana Menteri, ialah ketika ekonomi negara-negara Barat baik, kerajaan sanggup membayar saraan itu tetapi ketika ekonomi mereka merosot, sistem itu akan menjadi satu beban yang berat.

"Memandangkan kepada keadaan di Malaysia apakah tidak perlu kita memikirkan semula akan kegunaan ugutan dan mogok untuk menyelesaikan masalah?" tanya beliau.

Hakikatnya ialah kerana ada kemungkinan tindakan mogok atau "lock-out" oleh pihak-pihak yang berunding, maka rundingan menjadi tegang dan keputusan yang bijak sukar dicapai, kata Dr Mahathir. -- BERNAMA